

四庫全書

史部

欽定四庫全書

史部

平定準噶爾方略正編卷十五

三至五

詳校官監察御史臣孫家賢

通政使司副使臣莫瞻菴履勳

總校官進士臣

朱鈐

校對官編修臣

周厚轅

謄錄監生臣

汪瀾

欽定四庫全書

平定準噶爾方略正編卷十三

乾隆二十年夏五月乙未

命凱旋將軍暨新降台吉等赴熱河

避暑山莊

觀

上諭大學士曰本年七月十六日朕恭奉

皇太后鑾輿巡幸木蘭計回鑾至熱河時新附之台吉

噶爾藏多爾濟暨各宰桑等前來入覲正可召見
撫諭以慰其瞻仰之忱阿睦爾撒納策凌策凌烏
巴什等功成奏凱亦宜宴賞以示酬庸仍照上年
之例駐驛山莊優加饗賚舉行盛典所有一切應
行豫備事宜著各該衙門照例豫備

定西將軍永常疏奏西路兵丁分隊進發情形
永常奏言西路兵統計一萬六千名內派入哨
探兵隊內六千餘名臣帶領駐劄烏魯木齊兵

二千餘名其索倫兵三千分為三隊副都統額爾登額帶領頭隊叅贊大臣親王額林沁多爾濟總管畢里袞帶領二隊副都統三格帶領三隊俱於四月初九日至二十八日陸續前進其副都統莽阿納所帶健銳營兵一千名公品級拉里達等所帶哲里木兵一千名西安將軍都賚三等侍衛公豐安所帶西安滿洲兵一千二百五十名自五月初三日至初五日陸續抵烏

魯木齊軍營尚有西安滿洲兵一千二百五十名數日內亦可全到現據副將軍薩喇爾等文稱前隊哨探兵已入伊犁邊境至登努勒台地方會北路大兵於四月三十日一同進發所有三隊索倫兵丁仍令陸續前往策應其餘兵丁即令在烏魯木齊衝要地方駐劄聲援臣伏思天威遠播平定伊犁大功指日告成臣即帶領續到兵丁在烏魯木齊駐劄俟奏凱後再行籌辦撤

兵事宜奏入報

聞

戊戌

諭定北將軍班第等速解巴朗赴京

上諭軍機大臣曰據班第奏逃犯巴朗已經擒獲交喀爾喀協理台吉圖巴扎卜宰桑烏勒木濟解送前來巴朗係背恩脫逃重犯應即速解來京此時量已起程著傳諭班第等轉飭圖巴扎卜等小心

監押即速赴京仍將何時可到之處先行奏聞

庚子

定北將軍班第密奏阿睦爾撒納言語情形

班第奏言據阿睦爾撒納密行告稱若以噶爾

藏多爾濟為綽羅斯汗衆心多有不服準噶爾

風俗素稱强悍喜生事端心所不服者雖威力

挾制不久必更滋事不若於事定之時齊集各

宰桑得木齊等廣為諮訪現今噶爾丹策零雖

無嫡嗣於伊親戚中不論何姓擇其衆心誠服
能禦哈薩克布魯特者公同保舉奏請

皇上施

恩俾領其衆則輿情既協事後可以永遠寧帖臣告
以奉

旨封四衛喇特各為一汗令自管轄屢奉

諭旨甚明輝特和碩特都爾伯特已將爾及班珠爾

策凌等加

思分封獨準噶爾一部若另選別姓管轄不獨未合
聖意即準噶爾衆心亦豈能允服阿睦爾撒納復稱
我蒙

皇上重恩已極尊榮將來帶領屬人在阿爾台附近
地方游牧生理於願已足復有何求但我等四
衛喇特與喀爾喀不同若無總統之人恐人心
不一不能外禦諸敵又生變亂然此亦非急務
俟與額駙公同商酌再為陳請臣即密行知會

額駙色布騰巴爾珠爾豫為留心再自收服塔
本集賽以來凡有投降人衆俱云皆聞阿睦爾
撒納而來又屢次聲言準噶爾衆心無論何姓
惟能安撫大衆捍禦外患乃其所願伊此時惟
以糾合從前失散之人圖立產業牲畜為急務
又常言帶領鄂拓克投降之宰桑索薩賚等原
係伊輝特部落之人種種虛張聲勢其希冀僥
倖之心已經畢露俟大功告成臣與薩喇爾鄂

容安等惟悉心遵

旨辦理不使稍萌妄念再內大臣瑪木特退後每摘發阿睦爾撒納之短而覲面又多迎合似屬年老昏憤不可深恃奏入

上諭軍機大臣曰班第奏阿睦爾撒納言語情形一招阿睦爾撒納不無希冀僥倖之心班第答以準噶爾地方四衛喇特封為四汗之處業已降旨斷不可改持論甚為得體若止封阿睦爾撒納為汗

則辦理準噶爾一事全為伊一人集事矣然伊即
潛萌覬覦之念班第惟以奉有諭旨不敢妄行陳
奏正詞相拒料伊亦不敢遽爾妄行但此念既萌
久留彼處於事無益若即促其來京使之疑懼亦
有未便俟達瓦齊就擒之時將伊同衆台吉遣回
固可安然無事但從前原有留伊駐劄辦事之旨
班第恐急遽遣回致伊頓起猜嫌不若仍遵前旨
行班第惟酌量情形善為籌畫不必拘泥朕旨

至瑪木特原係一狡猾之人其行為更可不必深
論從前薩喇爾亦曾將衆人不願封噶爾藏多爾
濟為汗之處奏聞朕曾傳諭玉保令其暫停降旨
今阿睦爾撒納又為此言看來衆心果有不願亦
未可定班第留心訪問並察看噶爾藏多爾濟如
果不足服衆即由噶爾丹策零近族內揀選一人
封為綽羅斯汗之處作為己意密與阿睦爾撒納
商議具奏若其人尚屬可用即不必商辦總俟伊

入覲後再行定奪將此密諭班第知之

諭定北將軍班第等酌留駐劄伊犁兵丁

上諭軍機大臣曰據班第奏稱伊犁河北從前原有存貯米糧緞疋等物上年為哈薩克搶掠所餘馬匹牲畜俱經達瓦齊携往特克斯地方厄魯特回人等生計艱難不足以供應大兵口糧等語準噶爾地方數年以來屢遭兵革又為哈薩克搶掠現在居住之厄魯特回人等生計自屬拮据若於伊

犁多駐大兵深屬未便從前薩喇爾等奏請停止
伊犁駐兵經朕傳諭班第等令其酌留兵丁一二
百名為駐劄大臣差遣委用今功已告成大兵即
宜陸續撤回班第等現在自當即為辦理若尚未
議撤即遵旨妥協籌辦其應酌留兵丁一併詳議
奏聞

辛丑

命詳查派遣曉諭達瓦齊之噶勒雜特得木齊拜伯

勒克等加

恩優卹

上諭軍機大臣曰班第奏稱據投降之哈爾噶齊沙
津稟稱薩喇爾遣赴達瓦齊處曉諭之人因繞道
前往雖尚未見達瓦齊聞達瓦齊欲將所遣噶勒
雜特之人用刑訊問等語薩喇爾等從前遣人至
達瓦齊處曉諭原係彼時酌量事機辦理但以噶
勒雜特甫經歸順之人即令為使前往如果受達

瓦齊刑訊甚屬可憫著傳諭薩喇爾等所遣噶勒
雜特得木齊拜伯勒克等若僅止於受刑即酌量
加恩賞賚萬一為達瓦齊戕害即將伊子嗣查明
奏聞朕從優加恩賞給世職將此一併曉諭哈薩
克錫喇知之

定邊右副將軍薩喇爾等疏奏堪布喇嘛等率
衆來降

薩喇爾等奏言臣等分兵兩路渡伊犁河追躡

達瓦齊於四月三十日起程五月初三日抵伊犁河岸適副都統額爾登額帶領索倫兵一千名前來於五月初五日至初七日陸續渡河前行互為聲援一同前進軍威丕振近河居住之宰桑得木齊等自五月初一日至初七日陸續來降堪布喇嘛所屬得木齊鄂爾圖都布根都什厄魯特三百戶回人一百戶達瓦齊之親隨兵烏克圖哈什哈等二十餘戶伊犁居住回

人伯克默美特等二千餘戶楚爾和特宰桑圖
布慎等五十一戶烏魯特宰桑烏勒木濟等二
十四戶烏魯特宰桑和通等十九戶回人伯克
默美特尼默爾等一千六百戶都爾伯特扎薩
克台吉達什敦多卜之弟垂羅克三戶喀什噶
爾伯克賽音烏蘇卜等四十九戶共四千一百
六十六戶俱獎勵賞賚安插各原處居住其投
降之達什達瓦所屬人等二千餘戶內酌撥兵

六百名現在隨營効力臣等復遣人前往招服伊犁河原居住之朱爾都斯空格斯哈什等處烏魯特克勒特一萬餘戶人衆亦漸次來歸再臺站關係甚要擬將烏蘭烏蘇至烏魯木齊派侍衛海福管理自烏魯木齊至博羅塔拉道路較遠所係尤重派貝勒塞卜騰管理自博羅塔拉以外派總管巴祿管理復將新降回人伯克默美特派協同巴祿等辦理奏入報

聞

六月癸卯朔

諭定北將軍班第等曉諭準噶爾全部人衆

上諭軍機大臣曰準噶爾部落自策妄多爾濟那木扎爾以來互相戕殺內亂頻仍至達瓦齊愈肆虐所屬人衆皆不聊生朕憫念彼處生靈特遣兩路大兵往平準噶爾全部出水火而登衽席今伊犁已定所有投誠衆台吉等並感戴朕恩懇求入

覲朕亦欲令伊等來京瞻仰慰諭撫綏施恩賞賚
但現在軍行甫經平定彼處又與哈薩克布魯特
各部落連界須酌留辦事之人不必俱令前來入
覲著傳諭班第阿睦爾撒納等將應行入覲台吉
等派定遣來外仍於每部落酌留堪任辦事之人
在各游牧稽查彈壓俟下次再令更番前來方為
允協將軍大臣等暫留駐劄亦因準噶爾地方初
定現有應辦事宜俟一二年後諸事俱定即行撤

回再將彼處各台吉酌量勞績及所屬人數衆寡
分別加恩封為汗貝勒貝子公等爵雖各項爵秩
視汗自有等差其為辦理各該旗事務職任維均
至本部落各扎薩克等事務即不歸其統轄向來喀
爾喀內扎薩克等體制皆然朕視準噶爾衆台
吉與喀爾喀諸部落無異凡事俱一體辦理四衛
喇特台吉亦應照喀爾喀每部落設立盟長副將
軍各一員遇有應奏事件即報明駐劄大臣轉奏

至大臣等回京後即著報部轉奏所有應放盟長
及副將軍之人俟伊等到熱河入覲後朕量其人
才再降諭旨班第等可即通行傳諭準噶爾全部
人等知之

丙午

定邊左副將軍阿睦爾撒納等疏奏官兵擊敗
達瓦齊情形

阿睦爾撒納等奏言臣等於五月初五日渡伊

犁河領兵前進據散秩大臣阿巴噶斯等報稱
伊等於達瓦齊未到之先前往華諾海地方保
護游牧達瓦齊自格登地方復移至尚圖斯居
住等語臣等隨領兵趨行與西路大兵連絡聲
勢初十日至華諾輝圖西里見有賊人踪跡隨
赴西路副將軍薩喇爾等營定議兩路並進迨
至哈新烏蘇身親察勘則達瓦齊擁衆將及萬
人後負格登山崖前臨泥淖駐營固守正在相

度間據哨探人等將自達瓦齊營內脫出來投
之莽漢們都二人一併俘送臣等訊據供稱係
明阿特鄂拓克之人在特穆爾圖淖爾居住近
為達瓦齊調取前來今見大兵情願投誠至達
瓦齊自特穆爾圖淖爾帶兵來此住歇軍械不
整馬匹亦疲伊之情形雖不能深悉看其現在
帶兵來迎未必即有歸降之意然衆心離散願

投

天朝者甚多此時所有兵力已屬搜括無遺外此別無可調之兵等語臣等竊思達瓦齊雖尚率衆固守而氣衰力竭斷難久持且人心渙散日後願降若竟領兵掩殺既非所以仰體

聖主拯救準噶爾衆生塗炭至意即投誠人等亦不無因此遲疑却顧臣等詳察地利於十四日兩軍各據形勝整陣以待並示欲掠游牧之勢將誘出達瓦齊乘機執縛是夜派翼領喀喇巴圖

魯阿玉錫厄魯特章京巴圖濟爾噶爾並新降
宰桑察哈什等帶兵二十二名往探達瓦齊果
否在營而阿玉錫等奮勇突入賊營衝擊出其
不意放鎗吶喊賊衆驚潰紛奔自相蹂躪達瓦
齊僅率二千餘人竄去比黎明將餘衆一一收
服並獲其台吉二十人宰桑四人宰桑等子弟
二十五人及達瓦齊親隨兵五百餘名又各處
派調兵四千餘名併收取達瓦齊所居大蒙古

包一架礮六位而還臣等一面安撫人衆一面
令郡王青滾雜卜訥默庫班珠爾貝勒剛多爾
濟那木扎爾車蘇隆貝子策布登扎布沙克都
爾扎卜普爾普額爾德尼公布顏特古斯叅贊
大臣公達爾黨阿等率領官兵分路追躡臣等
亦統兵繼進收取達瓦齊妻子家屬伏念達瓦
齊雖暫因黃夜兔脫仰賴

聖主威福自可不日就擒奏入

上諭軍機大臣曰阿睦爾撒納等帶領官兵至達瓦齊駐營之地指示調度列陣揚威所派喀喇巴圖魯阿玉錫等帶兵僅止二十二名即能賈勇無前使賊衆驚潰敗走招撫數千餘人深屬可嘉喀喇巴圖魯阿玉錫巴圖濟爾噶爾察哈什等遵令乘夜翻營一鼓先登所向披靡尤為實力奮勉俱著加恩授為散秩大臣仍加賞男爵准其世襲並賜銀三百兩兵丁二十二名俱著授三等侍衛仍各

賜銀一百兩喀喇巴圖魯阿玉錫在軍營已及一
年現亦無事著即馳驛赴熱河到時朕仍從重加
恩遣回游牧居住其投誠之厄魯特莽漢們都原
係達瓦齊調取之兵傾心歸順將賊情詳悉稟告
亦堪嘉予著阿睦爾撒納等即酌量賞賚以示獎

勵

臣等謹案勇士臨陣果能中誠激發義不返
顧則一以當百無堅不摧固不在徒旅之衆

也

皇上鼓勵人材

恩深感切阿玉錫等一降人耳以其材可驅策

特命効力戎行備膺

寵遇果能邁往直前以二十二人深入賊營所向辟

易招服至數千餘人之多非簡練精銳豫養

士氣焉能殺敵致果若是及其攻破賊營即

命加顯秩厚賚且

寵錫嘉名圖形臺閣重示褒勸凡在疆場之人有不踴躍爭先者乎

命賞賚投誠台吉塞卜騰諾爾布等

上諭軍機大臣曰阿睦爾撒納等奏從前達瓦齊遣台吉塞卜騰諾爾布同宰桑奇塔特領兵往禦哈薩克塞卜騰諾爾布聞大兵到彼即殺宰桑奇塔特前來投誠甚屬可嘉塞卜騰諾爾布著各賞給貂帽一頂數珠一盤台吉伊什丹津係阿睦爾撒

納胞兄台吉諾爾布丹津係阿睦爾撒納同族台
吉巴特瑪車凌之弟伊等皆克殫誠心協力自効
以冀同沐朕恩著各賞給貂帽一頂數珠一盤帶
領所屬二百戶以上之台吉巴桑和碩特台吉圖
克進各賞給皮帽一頂荷包一對帶領三千戶來
降之綽和爾鄂拓克宰桑約蘇圖著授為散秩大
臣並賞給衣帽帶領百戶來降之得木齊巴爾達
穆特著授為三等侍衛所賞衣帽等物著派侍衛

濟福齋往並曉諭伊等俟入覲時仍加恩從優賞
賚再台吉諾爾布即令於此次前赴熱河入覲又
諭曰阿睦爾撒納等奏噶勒雜特宰桑特克勒得克
帶領得木齊四人前來投誠特克勒得克上年即
欲投誠因遇達瓦齊搶掠中止今聞大兵將到即
行歸順應施恩賞給職銜但所帶戶口數目未經
奏明著班第等即行確查特克勒得克所有戶口
數目或應授為散秩大臣或應授為何等侍衛之

處公同酌定傳旨加恩再帶領十三人來降之烏爾古濟爾係宰桑錫喇丹津之孫其年甚幼且伊祖母現已年邁冀得歸附受恩情尤可憫著賞給皮帽一頂俟赴熱河入覲再行加恩海爾圖納沁之孫約蘇圖亦令於此次前來入覲

命定北將軍班第等分別辦理自準噶爾來歸之滿洲蒙古綠旗兵丁

上諭軍機大臣曰阿睦爾撒納等將從前出兵為準

噶爾所獲之滿洲蒙古綠旗兵丁等現在陸續來歸作何辦理之處奏聞請旨滿洲兵丁出征被獲既不能歸又不識死綏之義醜顏視息安居異地至數年之久恬不為恥此等斷不宜仍令回至故土前此策凌阿睦爾撒納等帶來內地之人朕仍令賞給伊等今大兵前進陸續來歸之兵丁等應仍照前旨辦理但準噶爾全部業已平定此等皆係內地人民永遠棄置心有不忍將來事定後已

里坤仍須駐兵防守著傳諭班第等將陸續來歸之滿洲蒙古綠旗人等逐一查明若係兵丁俱遣往巴里坤居住如蒙古喀爾喀兵丁其中有願歸原游牧居住者准其遣回其不願者仍留巴里坤若係大臣官員即行奏聞明正典刑以彰國憲

丁未

定北將軍班第等疏奏擒獲達瓦齊家屬

班第等奏言達瓦齊攜帶殘兵蒼黃竄去經兩

路官兵追躡隨據官兵將達瓦齊所攜二千餘衆
內有流離散失者一路盡行收服餘隨達瓦
齊逃奔偷息者僅止百餘人不敢復歸游牧遼
道由奎魯克嶺向布魯特地方竄走臣青滾雜
卜訥默庫扎拉豐阿鄂容安等即赴達瓦齊游
牧處將達瓦齊之叔及妻子家口並喇嘛六十
餘人及附近部屬人衆盡行收服達瓦齊雖一
時苟延殘喘而追躡之叅贊大臣阿蘭泰王班

珠爾策凌烏巴什等悉力尾追勢難漏網况布魯特與達瓦齊素有仇隙即欲往投亦斷不肯為之容隱臣等即遣使明切曉諭自當即日就擒臣班第阿睦爾撒納薩喇爾現已會集一處一切應行籌辦之事謹遵

諭旨體察厄魯特情形次第辦理奏入

上諭軍機大臣曰班第等奏達瓦齊遺棄妻子身帶百餘人逃往布魯特地方阿蘭泰等領兵尾追不

日自當俘獲達瓦齊篡逆暴亂斷不可任其兔脫
倘或逃入布魯特境內班第等即選派幹練人員
遣往彼處明白開示務令將達瓦齊擒獻但止為
索取達瓦齊無庸帶兵前往不過遣一妥員經理
足矣阿睦爾撒納薩喇爾既深知彼處情形著與
班第悉心斟酌籌辦務期必就擒獲現在準噶爾
全部俱已底定惟餘達瓦齊一人未獲所有應行
前來入覲人員即當派定著阿睦爾撒納等將派

定人數及何日起程何日可到之處速行奏聞其
此次收取達瓦齊家屬奮勉行走官兵著將軍班
第等查明奏聞分別議叙賞賚

命授定邊右副將軍薩喇爾子玉魯斯為三等待衛
上諭軍機大臣曰侍衛濟福回京奏稱薩喇爾聞知
伊子信息惟以追擒達瓦齊為事並未遣人往尋
等語薩喇爾出力奮勉不以私事廢公實能明曉
大義朕心深為嘉予此時伊子諒已回至游牧著

加恩授為三等侍衛此朕因薩喇爾實心効力特
加優眷將此傳諭薩喇爾知之

已酉

上諭大學士曰平定準噶爾捷聞以數十年逋寇迅
就廓清荒服救寧中外蒙福迺我國家無疆之庥
緬維

皇祖聖祖仁皇帝削平三孽於康熙二十三年庚吉

東巡

親祭闕里

武功文德彪炳簡冊朕仰承

先烈集此大勳保泰持盈彌深兢業親告成功於

太廟

郊

社嶽瀆諸祀次第遣官敬謹舉行以昭茂典維

先師孔子闕里理應恪循

成憲躬詣行禮用申誠敬且自瞻謁

林泉已逾六載仰止之念時切於懷擬於明歲春月
敬奉

皇太后安輿自京啓鑾恭詣曲阜翠華所經亦以體察
吏治清問閭閻行慶施惠稱朕法

祖尊

師至意所有應行豫備事宜該部詳議以聞

命查核和通呼爾哈淖爾出征議叙世職人員

上諭大學士曰國家賞功酬庸予以錄叙所以激勵

戒行典至重也準噶爾一事從前我

皇祖

皇考屢申撻伐而彼部落藩籬完固未得機會是以暫
議撤兵邇年來喇嘛達爾扎達瓦齊等互相爭殺
內亂頻仍其台吉策凌策凌烏巴什阿睦爾撒納
等歿塞內附先後踵至朕為天下共主兼覆並恃
自當為之經理游牧以計長久而又適當達瓦齊
眾叛親離勢同瓦解此正機有可乘之時因議及

兩路進兵而人心狃於久安挾畏難之見者多而具奮迅之衷者百無一二今賴

上天默佑克集大勲計軍需所費較之從前纔及十之一二耳以機會所迫一舉可成之功猶多苟安懦怯徘徊觀望倘更有艱鉅過於此者尚安冀其勇往從事乎滿洲舊俗一聞用兵無不人人踴躍以不與為恥不意承平日久漸成畏葸之習至於如此是以朕於此大功克就遠夷歸化之時不為之

喜而為之寒心策楞舒赫德之畏蕙既已屢降明旨矣此次進勦命班第為北路將軍永常為西路將軍在班第領兵前進亦不過遵朕所授機宜罷勉無悞已邀爵賞然此爵賞非策楞舒赫德之所應得者乎使永常但效班第豈不同膺寵錫之榮乎乃伊自受事以來強欲自用又以不能預前進之例更沾沾以接濟兵糧為必不可緩之事以見己之長且曰自二月十二日裹兩月之糧今已將

盡矣獨不思按月齎糧原祇就大概通融計算若
一一計口授食則人之食量不齊有日食一盂者
亦有增至數倍者以食多者一月之用即可為食
少者數月之儲乃欲比量而差等之有是理乎且
因糧於敵亦從來軍行勝算永常又何獨明於彼
而暗於此也今大兵已集成功迅速何常有軍糧
不足之事設如伊所奏辦理將輾轉輓運動逾數
旬豈遂能接濟大兵之遙行耶况用兵於萬里之

外斷難斤斤以餽運為事永常所見仍兵行糧隨
漢人論兵故套而實昧於機宜不但此也此次功

成實賴

上天篤佑新附之人深感朕恩是以迅速集事耳若稍
有相持情形而永常糧絕之言中於人心其害尚
可問乎在永常罪且難追何得尚與有功者一體
錄叙耶至於昔年和通呼爾哈淖爾進兵時岱豪
等既不能殲賊立功又不能奮身拒敵束手受困

徒以自盡了事夫果有捐軀之志何不死於矢石之間蹈此婦人女子之為乎對敵之際而領兵之人相率自盡豈不先折士氣似此怯懦無能之人損威失重即自行引決猶當將伊子孫議罰尚何功之可錄乎且併有乘他人之勝輒將已繫頸之賊射死以示威者以今觀之豈不大可笑耶即阿岱等亦曾失悞軍機僅以身歷行間倖邀議叙此等世職勸懲攸關朕久欲查辦因西隅之事未竟

隱忍未經降旨現在大功既奏荒服牧寧有功諸
臣俱已特加懋賞其前此冒濫邀功者亦不可不
加釐剔以昭平允所有和通呼爾哈淖爾等處用
兵所得世職人員著交軍機大臣及該部詳悉查
明如有冒濫應行裁革者奏明請旨用副覈實獎
厲之道

庚戌

詔諭準噶爾全部台吉宰桑等

奉

天承運

皇帝詔曰爾準噶爾自白吉噶爾丹策凌時恭順天
朝尊崇黃教部屬人衆俱得安生朕是以施恩隄
其遣使往來歲通貿易嗣策妄多爾濟那木扎爾
繼立互相戕殺內亂頻仍達瓦齊更加暴虐所有
準噶爾全部人衆俱受荼毒朕為天下共主念噶
爾丹策凌之舊不忍坐視汝衆生於塗炭而各部

落白吉等相繼款關來降扶攜戶口數萬朕憫其窮蹙為之經理游牧以計久長是以特派將軍大臣等恭行天討命兩路大兵進勦驅除殘暴安輯生靈爾衆台吉等去逆效順感戴朕恩輸誠納款朕心深為嘉予今準噶爾全部底定仍將爾四衛喇特台吉等施恩封為汗貝勒貝子公爵令各管轄屬人安居樂業爾台吉宰桑等俱宜仰體朕一視同仁之意約束所屬人等安靜謀生勿因睚眦

小嫌互相構釁亦毋得將所屬人殘虐衆屬人等亦並遵守條教畜牧耕種各勤職業以共享太平之福爾等僻處遐荒朕自當示以懷柔之道如喀爾喀內扎薩克一體辦理自不以內地法度相繩再爾準噶爾人等向知尊崇佛法朕特為廣布黃教在伊犁設立庫倫宣誦經典俾羣生咸知敬奉爾等其善體朕心皈依佛法永遠遵守爾等自受達瓦齊凌虐衆不聊生今朕如此加恩爾四衛喇

特俱為天朝臣僕實屬厚幸務宜洗滌舊習永受
朕恩再哈薩克人等向與爾準噶爾有隙彼此時
相搶掠朕已降旨哈薩克令其毋得仍前侵越釐
定邊界勿相擾害爾等亦宜恪遵此旨不得將哈
薩克人衆肆行搶掠爾等其善體之

副都統納穆扎爾疏奏辦理輝特和碩特都爾
伯特各部落游牧事宜

納穆扎爾奏言臣同喀爾喀王得親扎卜帶領

阿睦爾撒納班珠爾等游牧人衆於四月十七日自塔米爾起程至五月二十二日陸續抵古爾班舒魯克等處喀爾喀公齊旺亦帶領都爾伯特納默庫等十旗游牧人衆於五月十二日抵鄂爾海西喇烏蘇等處臣等將游牧地方俱照阿睦爾撒納訥默庫等奏請所有輝特和碩特十三旗人令在古爾班舒魯克等處游牧都爾伯特十旗人令在鄂爾海西喇烏蘇等處游

收俱各指界限令其居住仍安放卡倫以資防
範奏入報

聞

癸丑

上諭大學士曰此次大兵進勦所有從前雍正年間
自青海畔逃之羅卜藏丹津及上年潛逃之都爾
伯特台吉巴朗孟克特穆爾等俱已就擒即日押
解來京所有獻俘典禮著該部察例具奏擇吉舉

行

命賞策楞都統職銜同副都統三格駐巴里坤辦事
上諭軍機大臣曰巴里坤管轄兵丁辦理事務不可
無大員專任策楞既知前愆此次在哨探兵隊內
行走尚屬奮勉著施恩賞給都統職銜同副都統
三格駐劄巴里坤辦理事務

命授投誠宰桑圖布慎等為散秩大臣

上諭軍機大臣曰薩喇爾等奏宰桑圖布慎鄂勒雖

等率衆來降圖布慎鄂勒錫俱著加恩授為散秩
大臣賞給翎帽衣服其帶領一千五百餘戶來降
之回人伯克錫里卜帕三著賞給貂帽一頂數珠
一盤其餘來降人等著傳諭班第等有應行賞賚
者查明具奏如應派令前來入覲俟至熱河時另
行加恩並將此先諭伊等知之

命陞授藍翎侍衛塔奇圖等

上諭軍機大臣曰薩喇爾奏前遣往曉諭達瓦齊之

藍翎侍衛塔奇圖等已回軍營塔奇圖等行走甚屬奮勉塔奇圖著授為三等侍衛前鋒策凌授為藍翎侍衛佐領孟克賞給藍翎其巴朗拜伯勒克被達瓦齊戕害深堪憫惻著薩喇爾等查明伊等有無子嗣併其族人歸入察哈爾旗內居住

乙卯

命郡王青滾雜卜貝勒策布登扎布管理新降烏梁

海事務

上諭軍機大臣曰新降烏梁海等現已編次旗分佐
領補放總管翼領等員足資管轄但係新降之人
必須大員統理和托輝特郡王青滾雜卜稔知烏
梁海情形即著管理烏梁海人衆貝勒策布登扎
布此次在軍前行走奮勉並著一同管理現在青
滾雜卜辦理烏梁海布珠庫等事務如未起程即
令策布登扎布同往查辦若青滾雜卜業已起程
策布登扎布自軍前回至伊游牧後班第等即速

飭知令伊前往會同青滾雜卜商酌辦理

丁巳

命定北將軍班第等酌議查辦副將軍阿睦爾撒納等前經被擄人口事宜

上諭軍機大臣曰永常奏副將軍阿睦爾撒納因查取伊去年被擄之人遣驍騎校賽孟阿宰桑和通向各處尋查伊等上年所失牲畜等項僅將阿睦爾撒納兄之女媳給令帶往其餘並未給還永常

所奏甚是此等人口皆係阿睦爾撒納來降時中途被擄若準噶爾未經平定進兵時自尋伊等台吉前來或以軍威收服理應清查辦理今各處台吉宰桑等俱冀受朕恩輸誠歸順但向伊等索取被擄之人尚屬可行掠及牲畜豈朕撫綏衆人之意現今準噶爾全部底定一切人衆俱係朕之臣僕豈可使一人從中滋擾且被擄者亦不止阿睦爾撒納所屬之人策凌策凌烏巴什訥默庫班珠

爾之人諒亦皆有俟大功告成此項被擄人等班
第等逐一查明歸併各部管轄此次必因阿睦爾
撒納尋取伊兄女媳所遣之賽孟阿和通等辦理
不善以致滋擾新降人衆必非出自阿睦爾撒納
之意著將永常所奏交班第阿睦爾撒納薩喇爾
等閱看此等業經被擄人等俟諸務告竣查明應
作何辦理之處議奏請旨

平定準噶爾方略正編卷十三

欽定四庫全書

平定準噶爾方略正編卷十四

乾隆二十年夏六月戊午

定北將軍班第等疏奏追擒達瓦齊情形

班第等奏言達瓦齊逃竄後臣等由兩路哨探
兵內派叅贊大臣青滾雜卜等相繼分路追擒
復派叅贊大臣阿蘭泰等帶兵由別路堵禦青
滾雜卜等至達瓦齊游牧處將伊妻叔家口及

喇嘛等六千餘人並游牧附近人等俱行收獲
達爾黨阿等追逐達瓦齊至奎魯克嶺見達瓦
齊已入布魯特境內我兵馬匹俱乏口糧不繼
旋經撤回看得奎魯克嶺外有通回子城及布
魯特部落之路達瓦齊亡命遁走或入布魯特
之境或向回子城或在偏僻處所藏匿俱未可
定隨派親王策凌烏巴什等帶兵八百名前往
偵探仍選侍衛台吉等向回子布魯特各處曉

諭利害令擒達瓦齊來獻投誠人等恭宣

聖旨善為安撫其有游牧較遠尚未來降如伯什阿
噶什等台吉古爾班和卓並大小宰桑得木齊
等俱遣人分路前往招服此次收獲達瓦齊游
牧時其新降無知之厄魯特兵丁不無竊掠財
物之事而達瓦齊所屬人內亦有乘間互行搶
奪者臣等一面遣人查明給還原物一面通行
曉諭衆部落之鄂拓克嚴行禁止再達瓦齊之

叔班株爾帶領伊子來降人甚庸懦今雖來降
終係賊黨應否免其治罪量給人十戶資其養
贍出自

聖恩其助達瓦齊為虐之宰桑衮布吞圖布並皆擒
獲衮布患病身故吞圖布現在看守其餘恩克
博羅特等亦已遣人往拿奏入

上諭軍機大臣曰班第等奏稱達爾黨阿策布登扎
布等追擒達瓦齊至奎魯克嶺見其已入布魯特

境內現在遣人曉諭利害令其擒獻等語此次進
兵無折矢遺鏃之勞衆俱降服不應使達瓦齊反
得逃遁大兵追賊至切近之時誠能奮勇前進自
必就擒何至令其免脫此係官兵不能鼓勇所致
乃謂因中途馬乏撤回獨不思達瓦齊脫逃時伊
之馬匹盡能不乏乎若論伊等不能極力追捕即
應治罪但念平定伊犁伊等與有勞績姑從寬免
著傳諭班第阿睦爾撒納薩喇爾等務將達瓦齊

擒獲此時達瓦齊或藏匿山林或遁入回子部落
皆易於搜獲阿蘭泰額爾登額等既豫先領兵堵
禦或即將達瓦齊擒獲亦未可定如果遠逃至布
魯特地方班第等遣人索取務應詞嚴義正責其
擒獻斷不可少示怯懦之形使布魯特不以為事
仍將派出之人奏聞再我大兵深入甫定伊犁理
應示以寬仁慰撫新降人衆今厄魯特兵丁等妄
行搶掠大干法紀將軍等即應嚴行查拿治以軍

法以示警戒乃僅傳檄禁止伊等安知畏懼但事屬既往姑毋庸深究著班第阿睦爾撒納薩喇爾等留心體察如有似此者嚴加懲治毋得稍事姑息

定北將軍班第等疏奏派定厄魯特王公及投誠台吉宰桑等分班入

覲

班第等奏言臣等前奉

諭旨將應令入覲之台吉宰桑等派定起程并將人數職名於何時起程何時可到之處豫行奏聞臣等伏思現今大功告成所有入

覲人等即應派定及早起程但達瓦齊尚未拿獲新降人內有誠心歸順者亦有畏懼兵威懾服者人心尚在未定且哈薩克及布魯特各部落諸事尚未全竣其防守地方約束兵丁應酌留大員經理臣等公同酌議派親王策凌策凌烏巴

什訥默庫等同去年未經入

覲之親王班珠爾等五人前赴熱河入

覲其都爾伯特貝勒剛多爾濟及策凌孟克等暫留

管轄兵丁新降之台吉宰桑內量其能辦事如

台吉唐古特察滾及散秩大臣阿巴噶斯宰桑

約蘇圖等留營辦事其餘品級較大形跡可疑

如噶爾藏多爾濟等台吉十員厄爾錐音等宰

桑十三員作為第一起派親王策凌及郡王札

拉豐阿帶領起程其第二起派親王班珠爾等
及阿睦爾撒納之兄台吉伊什丹津等十二人
並宰桑噶都爾等十三人令叅贊大臣阿蘭泰
帶領起程向後伯什阿哈什等大台吉若能趕
至臣等亦令起程附入第二起前進如日久不
到俟明年令其入

觀現在第一起人等於六月初旬起程九月下旬可
至熱河第三起人等於六月二十內起程中途

略加趨行亦可與第一起一同前至熱河瞻仰
天顏奏入

上諭軍機大臣曰班第等將今年應來入覲之台吉
宰桑等列名具奏朕交軍機大臣查核有從前未
經具奏之人現在派出亦有從前奏聞經朕加恩
賞給爵秩之人未經派出者再朕曾特行降旨令
其前來之霍集占烏爾古勒濟勒約蘇圖喀喇巴
圖魯阿玉錫等二十五人俱未列入單內著傳諭

班第等此次未曾派出入覲人員共有若干此外
新降之人又有若干明年能全令來京與否如果
不能再分作兩年以次入覲詳悉奏聞再摺內所
稱品級較大形跡可疑之人俱已派出前來並著
詢問班第所謂可疑者幾人其如何可疑之處遇
便亦即奏聞

定北將軍班第密奏阿睦爾撒納情形

班第奏言五月二十二日奉到

諭旨因阿睦爾撒納前請籌辦接濟兵丁口糧事宜
奉

旨訓示實明見其肺腑臣如意慎密不露形迹凡事
仍公同商酌冀其默化惟額駙色布騰巴爾珠
爾不免墮其術中於臣所行之事每多阻止以
順其意阿睦爾撒納漸至相習無忌又與薩喇
爾瑪木特俱不和睦每事與薩喇爾抵牾一切
要務並不上緊辦理以致遲悞臣自到伊等隊

內竭力調劑惟仰藉

聖主威福成就大事今阿睦爾撒納漸成驕縱又利
慾薰心伊所屬人等沿途搶奪有經首告者並
不懲治且自言不能禁止經臣屢加提警始將
游牧內彼此搶奪之處曉諭查禁臣惟有欽遵
諭旨盡心竭力與鄂容安密商協力共濟奏入得

旨仍照朕從前所降諭旨令其速回但此旨一到即
行催促又致易生疑懼諸凡惟在汝持重辦理諒

伊亦不敢滋事也

己未

叛犯羅卜藏丹津巴朗孟克特穆爾等解送至

京遣官告祭

太廟

社稷

諭定西將軍永常籌辦撤兵事宜

上諭軍機大臣曰永常議奏撤回兵丁摺內稱哲里

木兵丁及各處兵丁編作行隊至嘉峪關肅州分
隊遣回又稱哲里木兵丁若自烏魯木齊赴博羅
塔拉由阿爾台一路遣回稍覺紆迴不若令其回
至巴里坤由北路順便遣回等語永常此奏前後
矛盾殊不可解哲里木兵丁回至巴里坤時即由
近日策凌等所走阿濟必濟等處遣回游牧甚覺
便捷著永常即照此辦理但伊摺內既稱至嘉峪
關肅州分隊遣回又云至巴里坤由北路遣回究

竟作何行走著永常即速奏聞再綠旗兵丁不必
存留莽阿納帶往健銳營滿洲兵一千名令駐劄
巴里坤朕已降旨即遵照前旨行其哨探隊內兵
丁俟薩喇爾辦理外所有別項兵丁著照伊所奏
俟薩喇爾等移咨撤兵時即行辦理

庚申

上御午門樓行受俘禮巴朗孟克特穆爾

命刑部即行正法羅卜藏丹津交軍機大臣等審訊

命議處郡王青滾雜卜追擒巴朗不力罪

上諭軍機大臣曰上年巴朗逃遁策楞等派兵令青
滾雜卜努三等前往追擒在和通鄂博堵截後聞
巴朗等由額林哈畢爾噶遁走即行撤回今審訊
巴朗原係由哈卜塔克拜塔克逃去青滾雜卜努
三等領兵在彼並不能實力追擒均屬不合努三
已經治罪青滾雜卜並著交部議處

辛酉

命定邊右副將軍薩喇爾領兵赴布魯特部落追擒

達瓦齊

上諭軍機大臣曰班第等拿獲達瓦齊宰桑策凌多爾濟等訊問口供知達瓦齊現逃往布魯特境內我大兵深入平定伊犁阿睦爾撒納薩喇爾等若果輕騎掩襲達瓦齊即可擒獲乃將軍等因伊犁既定稍覺大意以致達瓦齊脫逃伊等原奏內稱達瓦齊帶領百餘人逃遁今又稱帶領千餘人其

脫逃日期前後亦不相符此時務須併力擒獲現在班珠爾阿蘭泰等領兵追擒尚未回營若果已為班珠爾等擒獲甚善倘尚未擒獲達瓦齊必已入布魯特班第等量已遵朕旨遣人曉諭索取布魯特遵諭擒獻則已如不即日擒獻大兵現集伊犁即著副將軍薩喇爾帶領精兵數千名至布魯特邊界駐劄以振聲威揀選強幹人員遣往布魯特剴切曉諭如敢稍為觀望即進兵擊取務期擒

獲達瓦齊此事關係甚要斷不可再失機會薩喇爾宜加意奮勉不得稍有怠忽班第阿睦爾撒納暫駐伊犁辦理事務仍將薩喇爾進兵情形隨時速奏又

諭曰班第等奏稱擒獲達瓦齊宰桑策凌多爾濟摩羅等請旨作何辦理等語策凌多爾濟摩羅皆被獲之人並非誠心歸順雖不應施恩亦可無庸治罪將來似此者尚多著班第等仍將策凌多爾濟

摩羅留於原游牧處居住伊等若有管轄之人亦即查明給與四品總管職銜仍著伊等管轄

定北將軍班第等疏奏撤兵事宜

班第等奏言準噶爾全部平定遵奉

諭旨令臣等等議撤兵事宜臣等伏思達瓦齊尚未擒獲其路遠之大鄂拓克宰桑尚有未經投降者數人再將略有可疑之台吉宰桑等派入第一起甫經起程入

覲若將大兵全行撤回殊有關係臣等公議將已至伊犁兵丁暫令駐劄其後隊續到兵丁內有未抵博羅塔拉者全行遣回其已抵博羅塔拉者即在彼處牧放馬匹暫行存留再西路應行遣回之索倫巴爾虎察哈爾各扎薩克蒙古兵丁若令與北路一併同行則沿途水草恐有不敷且伊等前來時牲隻行李等項俱留於巴里坤今應仍令伊等由額林哈畢爾噶至巴里坤向

阿濟必濟卡倫邊外行走各回游牧其辦理接濟西路兵丁口糧現咨薩喇爾并將軍永常於現運茶封內酌量接濟其北路續到之兵原領口糧三個月臣等酌議所有未至額爾齊斯即行撤回之兵應毋庸再給口糧如已過額爾齊斯自察罕呼濟爾等處撤回者三人合給牛一頭若已至博羅塔拉等處撤回者二人合給牛一頭以資接濟奏入報

聞

定北將軍班第疏奏派兵招服烏梁海事宜

班第奏言和托輝特郡王青滾雜卜遵

旨領兵收服汗哈屯等處居住烏梁海人等與額駙

色布騰巴爾珠爾定期於五月二十六日起程

據阿睦爾撒納告稱不必令青滾雜卜前往惟

遣使將準噶爾全部底定曉諭伊等自必歸降

領兵前去轉恐畏懼逃避是以暫令青滾雜卜

停止起程及商議遣使前往阿睦爾撒納派出
新降宰桑圖布慎并伊屬下舊在烏梁海處之
達巴霍爾又囑令烏梁海宰桑等前赴伊犁俟
見伊之後再由此入

觀臣思烏梁海等從前未經歸降不過觀望準噶爾
情形今準噶爾業已底定烏梁海等可毋庸加
兵自然歸順此理勢所必然但觀阿睦爾撒納
之意深欲要結烏梁海且歸功於已是以臣仍

令青滾雜卜前往并告以此次帶兵收服原係
回途乘便並無勞費如恐烏梁海等畏懼祇於
兵到之先遣人剴切曉諭伊等來降即行安慰
拊循其未降順者再進兵收服至新降宰桑等
即由彼處就抵烏里雅蘇台赴京入

入

上諭軍機大臣曰據班第密奏阿睦爾撒納不欲遣

青濠雜卜招降汗哈屯居住之烏梁海等惟派令
新投宰桑圖布慎等曉諭招降班第未經允從仍
遵前旨辦理等語甚屬持正得體從前曾疑阿睦
爾撒納有希冀倣倖之心今觀此事阿睦爾撒納
雖萌妄念班第能果斷定奪阿睦爾撒納亦並不
敢有異詞似此遵行當亦無可疑慮嗣後班第惟
凡事據理直行逆折其計阿睦爾撒納雖有私心
班第若將正言開示料伊亦不敢故違伊係狡黠

之人若過於防維日久必露形跡轉覺於事無益
著密諭班第知之

命免準噶爾人等本年貢賦

上諭軍機大臣曰準噶爾全部底定理應加恩撫綏
除各台吉屬下應征貢賦皆台吉等自行辦理毋
庸另議其無台吉之宰桑等所轄人等貢賦前此
諒必俱向達瓦齊交納如舊日所存尚多足敷養
贍喇嘛之用著將今年伊等貢賦概行寬免若不

數用祇將養贍喇嘛之數徵收其餘即行寬免將此通行曉諭準噶爾人等仍交班第等將準噶爾人等每年應交貢賦數目多寡自明年為始令如何交納之處查議具奏

壬戌

命免治羅卜藏丹津罪

上諭軍機大臣曰羅卜藏丹津背恩叛逃理應從重治罪但伊入準噶爾年久又率伊二子迎接大兵

隨同前進朕特施恩將羅卜藏丹津父子免其死
罪羅卜藏丹津著留京賞給房屋一所居住不許
擅出伊二子著入正黃旗蒙古旗分授為藍翎侍
衛在司轡上行走並著班第等查明羅卜藏丹津
家屬及所屬二十戶不必遷移仍令在原處居住
羅卜藏丹津二子於此處另行賞給妻室

命查明噶爾丹策零所屬戶口數目並加

恩茂海策凌等子姓

上諭軍機大臣曰薩喇爾等奏投降人數摺內稱克勒特宰桑那嚴泰二千六百戶烏魯特宰桑和爾和岱耨特勒齊杭吉勒圖托克托博羅特錫克錫爾格共五千戶等語伊等戶口數目甚多原係噶爾丹策零屬下宰桑彼處似此者尚多不得併入別部落應俱照瑪木特等人衆之例辦理著班第阿睦爾撒納薩喇爾查明此等戶口共有若干奏聞辦理再茂海策凌係叛往準噶爾之人理應從

重治罪令俱身死伊子皆率彼處居住屬下人衆
迎接大兵投降前來茂海之子齊默特多爾濟又
帶兵追擊達瓦齊所有茂海策凌子姓俱著從寬
免其治罪其屬下人等仍令在準噶爾居住班第
等明白曉諭伊等知之

命嚴緝搶劫運糧商人賊匪

上諭軍機大臣曰據山西巡撫恒文奏稱運糧商人
張祿宣交糧回至第二十六臺於扎薩克林丕勒

所屬鄂倫淖爾地方遇賊人搶去衣服銀兩並駝馬各項等語以運送官米之人膽敢結黨搶劫目無法紀似此要犯不得照尋常盜案完結著交該部派唐喀祿嚴飭所屬扎薩克人等務令即速擒獲以示懲儆毋得遲延推諉

癸亥

命賞都爾伯特等被災人等米石

上諭軍機大臣曰納穆扎爾奏稱都爾伯特訥默庫

等十旗人於去冬今春連遭霜雪牲隻多有傷損
所種地畝秋間始行收穫生計稍艱等語此項人
等投誠後屢次賞給牲隻口糧以資接濟今牲隻
既已被傷生計拮据著加恩再賞米五百石以示
體卹

甲子

定北將軍班第等密奏阿睦爾撒納圖占伊犁
情形

班第等奏言臣等自入準噶爾邊境以來悉心
察訪部落人衆習尚狡詐惟圖私利罔知恩義
數年來生計貧乏攘奪相尋今大兵駐劄尚有
掠取站馬搶奪行人之事雖交該宰桑得木齊
等緝拏遲延未到將來大兵既撤勢必益加怠
玩况臣等同辦軍務之人不能秉公竭力共勦
國事但借辦公之名濟其私欲如阿睦爾撒納者
其初尚知感戴

皇恩臣等見其貪利妄行力為勸阻伊即聽從尚有
勉力速冀成功之意自入塔本集賽游牧以來
仰仗

天威所至迎降伊漸志足意滿惟知尋獲被搶人口
攫取牲畜為務有意遷延致誤會集博羅塔拉
日期又妄自誇張謂凡來歸之衆俱係為伊投
誠及入伊犁益無忌憚凡伊兄弟暨所屬人等
肆行劫奪不行禁止及得達瓦齊游牧所收牲

隻財物多方隱匿貝勒策布登扎布曾言伊搶奪鄂勒錐宰桑游牧處駝馬各千餘羊至二萬餘此外更不知凡幾伊素性貪忍意圖占據準噶爾地方凡有讐隙者任意殺害是以衆心怨恨伊欲擁衆自衛不願大兵撤回臣等時為催促推諉觀望且云巴里坤額爾齊斯二處仍須各留精兵五千駐防過冬語益堅執明係仗我師力威服準夷以遂私計全不知感戴

皇恩籌辦善後事宜至奉曉諭哈薩克

勅書時阿睦爾撒納故意猶豫欲待伊先行遣使文
內又有伊領蒙古漢兵在此駐劄之語策布登
扎布向納噶查爭論謂爾等何不將身受

大皇帝之恩帶兵前來據實告知竟若自行前來者
納噶查始終不遵經臣等力指其非始令侍衛
順德訥同伊使奉

勅前往再收取達瓦齊游牧時伊意不欲查明一切

牲隻財物數目後臣等派人同瑪木特往查仍
百計阻撓至今尚未清晰至查辦牧場及遣人
收服四路之事至今亦並未辦理一意遷延惟
與各宰桑頭目私行往來行踪詭秘即如各部
前往熱河入

覲之人並不即為派定催促再四始行開送又屢行
更換及至起程仍不免舛誤凡有傳行事件並
不用印信仍做達瓦齊私用小紅鈴記臣等節

次理諭終不遵行動即揚言此處人衆欲叛視
薩喇爾如仇敵潛行猜忌看來阿睦爾撒納圖
據伊犁戀戀不已仰懇

特降諭旨令其速行入

覲早定四部封汗之事以杜非分之想至納噶查居
心詭詐惟知附和阿睦爾撒納已在

聖明洞鑒之中此間衆論亦以納噶查前在策妄多
爾濟那木扎爾時阻撓挾詐共相怨恨並懇降

旨將納噶查調往青海駐防以散其黨再阿睦爾撒
納揚言此處喇嘛等謀叛臣等請將濟隆胡土
克圖速行遣往令其宣諭衆庶安輯人心若阿
睦爾撒納久在此處致伊等互相猜疑必至生
變或因欲實其言潛行鬼域故生事端俱不可
不先事豫防奏入

上諭軍機大臣曰班第鄂容安將阿睦爾撒納妄行
覬覦阻撓事務及貪取牲畜各情形密行陳奏班

第鄂容安留心察看阿睦爾撒納居心行事據實
奏聞甚屬可嘉但初覽伊奏似事端已成再四詳
閱仍係阿睦爾撒納希圖徵倖貪得牲隻什物耳
並無圖占準噶爾確據阿睦爾撒納自投誠以來
疊受朕恩事事出於望外至朕辦理庶政一惟秉
公執法之處伊未經身試是以志氣驕盈希圖徵
倖亦事所必有班第等即據實陳奏深得防微杜
漸之意今朕於阿睦爾撒納奏摺內溫旨批諭令

伊即行入覲班第等亦婉言曉諭使其起程前來
毋致驚疑此時班第鄂容安再悉心察看如阿睦
爾撒納占據僭越之形果有實據即行密奏朕另
行定奪如並未至於此極不過希圖肥己亦不必
過於苛求倘伊稍有知覺轉於事無益著班第鄂
容安密與薩喇爾詳細商議公同體察奏聞若無
確據而過甚其詞亦不能逃朕洞鑒班第等務宜
詳密毋得稍有洩漏又

諭曰阿睦爾撒納此次辦理諸事動合機宜朕甚嘉悅且修軫念想阿睦爾撒納亦必急思入覲瞻仰朕躬昨雖已降諭旨達瓦齊或往投布魯特著薩喇爾帶兵往擒班第阿睦爾撒納駐劄伊犁此特欲其協理伊犁事務今思伊犁亦無重大事務即使薩喇爾帶兵前往布魯特班第鄂容安現在伊犁足資辦理著阿睦爾撒納遵朕從前所降之旨即行馳赴熱河朕俟阿睦爾撒納到後施恩將四

衛喇特分封四汗賞功策勲用獎勞績著即傳諭
班第阿睦爾撒納知之

命凱旋京兵一千名駐劄巴里坤軍營

上諭大學士曰此番凱旋兵丁除索倫哲里木等兵
由口外游牧行走其由西路行走之京兵一千名
現議令駐劄巴里坤軍營所有經由之甘陝河南
直隸等省臺站車馬均可不必籌辦

定北將軍班第等疏奏遣使曉諭哈薩克事宜

班第等奏言臣等接奉

皇上頒發哈薩克諭旨敬謹繙譯蒙古文派侍衛順
德訥宰桑巴桑策凌前往曉諭臣等復行文哈
薩克云嗣後爾等與準噶爾人等應恪遵

大皇帝諭旨仍前和好所有彼此互行搶奪之物俱
各給還如願歸誠承受

天朝恩澤即遣明白曉事陪臣前來當即代為陳奏
奏入

上諭軍機大臣曰班第等奏稱派侍衛順德訥宰桑
巴桑策凌齋奉勅書前往哈薩克曉諭其行文有
從前攘奪之物各行給還仍前和好等語班第等
此言甚屬錯謬伊等從前互相劫奪係達瓦齊喇
嘛達爾扎時事與現在無涉止應將準噶爾地方
全行底定汝等從前之事俱不深究嗣後毋許再
行搶掠方合事宜其措詞殊未允協此際想已遣
往俟順德訥等回時將哈薩克言語情形即速奏

聞再阿睦爾撒納之兄巴特瑪車凌究在何處有
無信息一併具奏

定北將軍班第等疏奏遵

旨定擬賞給鄂哲特頭等侍衛職銜并派定入

覲人等事宜

班第等奏言臣等接奉

諭旨公同商議宰桑鄂哲特本非誠心來降乃畏懼
兵威始行歸順若給與散秩大臣職銜似無區

別蒙

皇上睿鑒令臣等酌議或授散秩大臣或授頭等待衛擬將鄂哲特授為頭等待衛已沐

聖主格外殊恩且與伊分相當現在派入第一次入
覲人員內業經起程至喀什噶爾霍集占之兄波羅
泥都即係西路所收回人之和卓木弟兄二人
內應留一人照管游牧其波羅泥都現已派入
第二次入

覲人員內再和通額默根之弟格勒克雅喇木丕勒
因伊兄已派定入

覲應即將格勒克雅喇木丕勒亦暫留游牧照管奏
入報

聞

丁卯

定北將軍班第等疏奏留兵駐劄尼楚滾地方

事宜

班第等奏言薩喇爾奏善後事宜一摺蒙

恩指示於功成後令大臣等駐劄伊犁一二年辦理
事務其應留兵若干令臣等公同議奏臣薩喇
爾原奏烏魯木齊魯克齊木等處駐兵游牧係
指種地而言摺內未經詳悉聲明今伊犁地方
既令大臣駐劄辦事誠不可不留兵駐守以備
差遣應照原議駐兵五百名派察哈爾兵三百
名喀爾喀兵二百名現在達瓦齊雖未就擒諸

事業經大定伊犁毋庸大兵久駐應遵

諭旨撤回臣等亦遷渡伊犁河於尼楚深地方駐劄
辦理事務其凱旋兵丁分作三隊相繼起程現
在博羅塔拉之兵業經移咨遣回所有北路凱
旋兵丁由察罕呼濟爾額爾齊斯青吉爾布拉
罕等處至巴顏珠爾克卡倫酌給口糧一個月
至烏里雅蘇台時各量游牧遠近再行辦給西
路凱旋之索倫巴爾虎察哈爾扎薩克各處蒙

古兵丁由額林哈畢爾噶抵巴里坤至阿濟必
濟卡倫亦酌給口糧一個月至推河時亦計各
游牧遠近再行辦給其健銳營西安寧夏涼莊
阿拉善綠旗等兵丁俱由原路行走其酌給口
糧馬匹等項俱令將軍永常遵議辦理奏入

上諭軍機大臣曰班第等奏稱大兵陸續撤回留察
哈爾兵三百名喀爾喀兵二百名駐劄尼楚滾地
方以資差遣防守等語所辦甚是朕前降諭旨令

在巴里坤烏里雅蘇台兩處駐劄官兵將前往西路健銳營兵一千名留駐巴里坤命策楞三格駐劄辦事今又於尼楚滾地方駐兵三處聲勢聯絡互成犄角之勢務宜同心協力彼此商酌辦理以期公事有益策楞已派辦巴里坤事務著即起程前往所有應辦事務悉心籌畫俟辦理已有端緒永常即領後隊兵丁前來其帶領入覲台吉宰桑人等現有扎拉豐阿玉保二人烏里雅蘇台事務

著阿蘭泰留辦俟伊到後莫爾渾即帶領入覲人等前來再巴里坤有無可種地畝及駐劄大兵或應在巴里坤或應在烏魯木齊並著班第等詳議

奏聞

命舒赫德仍留烏里雅蘇台以章京効力行走

上諭軍機大臣曰從前因策楞舒赫德辦理錯誤特將伊等革職令在軍前効力今大功已成朕原欲一體施恩與以奮勉之路策楞人本糊塗諸事皆

聽舒赫德指使已賞給都統職銜領兵駐劄巴里坤以觀後效至舒赫德遇事毫無定見且未免退有後言今查其筆札雖無怨望之詞然以滿洲世僕漸染漢人習氣每日記事作詩即不必治罪亦不宜加恩此乃伊之自誤著仍留烏里雅蘇台以章京効力行走嗣後務宜痛自改悔若仍蹈前轍朕必重治其罪

戊辰

定北將軍班第等疏奏擒獲達瓦齊

班第等奏言從前達瓦齊敗走時臣阿睦爾撒
納即令屬人朗蘇巴朗同回人阿卜都哈里克
等向阿克蘇圖爾璦回人等曉諭倘達瓦齊逃
避前去務即擒獲解送今於六月十三日朗蘇
巴朗同圖爾璦之阿奇木霍集斯伯克遣人至
軍營告知達瓦齊已被拏獲並呈霍集斯伯克
之書內稱遵照來使傳語於各嶺隘口俱設卡

倫瞭望本月初八日達瓦齊在喀什噶爾交界處駐劄即遣我弟攜帶酒馬迎接並稱我因病不能前來爾今欲往何處并需用何物我自當豫備何不即來我處暫住達瓦齊因遣圖巴回答有汝既有誠心我即應前去之言我因伏兵林內將伊擒獲現帶兵二百名將達瓦齊解赴軍營伊子羅卜扎宰桑愛爾齊丹津達爾巴蓋烏巴什敦多克摩羅木色克色德克吹索諾木

額木齊圖巴等七十人全行擒獲懇即遣兵一隊前來木素爾口迎接等語臣等即派索倫兵三百名喀爾喀厄魯特兵二百名令副都統額爾登額喀爾喀公策登薩木丕勒等於十四日起程前往木素爾迎接令將達瓦齊嚴行看守解送並遣人前往告知回人霍集斯伯克令其一同監送前來奏入得

旨下部知之

定北將軍班第等密奏阿睦爾撒納擅自調兵
情形

班第等奏言據喀爾喀貝勒策布登扎布呈稱
阿睦爾撒納指稱防守哈薩克布魯特調兵九
千名分駐二處此事曾否會商已定密行咨詢
臣等以阿睦爾撒納並未先行會商面加詰問
伊始告稱傳問薩哈克有前來之信布魯特亦
有搶奪邊境之語是以由博羅塔拉等鄂拓克

集兵五千名擬在博羅呼濟爾地方防守哈薩克保護游牧由阿里瑪圖等鄂拓克集兵四千名擬在布敦阿璊地方令其駐防等語臣等詰以哈薩克布魯特何敢輒行侵犯至各處調兵有無滋擾游牧人等且豫備應至何時而止阿睦爾撒納云哈薩克布魯特前來如好言遣回則已若妄行劫擒有此豫備之兵既易於邊擊而游牧人等亦可照常耕牧生理不致驚擾且

不過豫備兩三月俟遣使回時即可撤回臣等
隨公同商定派兵豫備次日正欲鈐印行文伊
稱業用伊圖記發行臣等諭以一切行文俱當
用

皇上欽頒印信不得擅用圖記恐奸人從中假冒嗣
後若非印信文移諸事不准遵行違者治罪現
在通行傳飭遵行奏入報

聞

定北將軍班第等疏奏派波羅泥都招服回衆事宜

班第等奏言據阿克蘇回人頭目阿奇木阿卜都伯克等呈稱

大皇帝撫綏準夷遣兵平定俾羣生樂業今聞葉爾羌喀什噶爾將欲興兵而包沁奇卜察克和碩齊等又欲會合搶擄阿克蘇圖爾璫多蘭賽里木人衆如果前來此處兵少力弱難與抵敵求

酌量發兵將我舊伯克和卓木一併遣來拯救
等語臣等查和卓木即交阿巴噶斯游牧照管
之波羅泥都霍集占兩路大兵前進時伊兄弟
相繼投誠業經遵

旨將波羅泥都派令入

覲其霍集占留管游牧伊等原係喀什噶爾回人頭
目因葉爾羌喀什噶爾人心所服是以懇求前
往阿克蘇城招服葉爾羌喀什噶爾人衆臣等

公同商酌即照所請令往阿克蘇招服回衆俟
事後再令赴京入

覲奏入報

聞

命宥茂海巴濟等子孫罪

上諭軍機大臣曰班第等奏稱從前叛逃之茂海巴
濟等皆陸續死亡現在祇存巴濟之弟達什達爾
扎噶爾丹達爾扎另行拿解赴京其餘所有子孫

或係幼時逃往或即在彼處生長應作何辦理之處具奏請旨等語罪人子弟理應治罪但伊等父兄俱已死亡姑從寬免伊等皆由喀爾喀叛逃今應仍令在喀爾喀居住但所屬戶口甚多著於伊等台吉內令其大者准帶三十戶次者二十戶小者十戶先移至喀爾喀居住其餘戶口俟諸事辦竣後再行酌量辦理伊等台吉仍遣至熱河令其

入覲

平定準噶爾方略正編卷十四